

昭忠祠列傳續編

卷一百五十八



昭忠祠列傳續編卷一百五十八



安徽官員

勦辦捻匪

總兵

西林布

王鳳祥

監生

蔣興朝

藍翎守備銜把總

葉正

總兵

承惠

副都統銜佐領

喀爾庫

花翎參將

吳明亮

把總

楊清擢

西林布傳

西林布。達呼爾阿勒丹氏。滿洲鑲紅旗人。駐防黑龍江齊齊哈爾。由委前鋒於道光三十年。補驍騎校。咸豐三年。升佐領。出師河南。旋檄調赴援直隸。山東。江南。安徽。湖北等省。屢著戰功。五年。克復湖北德安府城。

賞戴藍翎。尋升委參領。六年。武昌踞匪分撲洪山一帶。知府李續賓等會合水陸各軍。分攻合剿。西林布與委參領花凌阿等率馬隊渡江。連日鏖戰。斃賊數千。焚賊船百餘。援賊及城內之賊仍分路竄撲。各軍嚴陣以待。斬悍賊數名。賊稍卻。西林布等馬隊四面衝擊。賊遂大敗。又殲

賊於沙子嶺雙鳳山等處。尤為出力。巡撫胡林翼奏入。

賞加阿木爾罕巴圖魯名號。七年。以克復武昌。漢陽黃州。及大冶興國等城。又攻燬小池口賊營。勦敗宿松太湖大股援賊。西林布在事出力。總督官文彙案保奏。得旨以協領補用。尋補墨爾根城鑲白旗協領。

賞加副都統銜。九年。皖逆陳玉成糾聚捻匪。在
潛山縣地靈港東西兩岸築壘二十餘
座。意將分路上犯。以解太湖之圍。西林
布與副都統多隆阿等分兵夾擊。深入
重圍。力竭死之。事

聞。

命照副都統例從優議卹。尋

賞卹如例。

贈太子少保銜。

恩給騎都尉兼一雲騎尉世職。子博昌襲。

王鳳祥傳

王鳳祥。順天寶坻縣武監生。捐納衛千
總。道光九年。補浙江湖州所領運千總。
歷重運三次。十四年。俸滿引。

見得

旨以營缺升用。十五年。升山東泰安營守備。十
八年。署臨清營都司。以催趲漕船出力。

記功。二十一年。暎咭喇夷船內犯。各海口戒嚴。鳳祥帶兵防守登州海口。並監鑄海防礮位。工竣。以妥速無誤記功。二十三年。調單縣營守備。二十八年。升山西石樓營都司。旋在順天捐輸經費。

命以遊擊分發山東補用。三十年。署文登協副將。咸豐元年。署單縣營參將。二年九月。

署克州鎮標中營遊擊。十月。沂州府屬

蘭山郟城一帶。幅匪滋擾。鳳祥奉檄征勦。旋赴郟城紅花埠地方駐紮堵禦。時

廣西會匪洪秀泉等。逆燄方張。蔓延兩楚。江皖各境。三年五月。鳳祥調赴江南。宿遷縣防堵。逆尋由皖豫分竄山左右。闌入直隸。擾及河間天津等處。四年二

月。鳳祥奉調帶兵折回東省。追勦北竄
逆匪。三月。克復臨清州城。匪旋竄踞連
鎮。鳳祥移兵德平縣防守。十月。補高唐
營遊擊。五年四月。大軍克連鎮。鳳祥以
防堵出力。經山東巡撫崇恩奏獎。

賞戴藍翎。並以捐助軍餉。下部議敘。匪先後踞
山東高唐州。暨馮官屯等處。大軍以次

攻克之。鳳祥均在事出力。尋奉檄統帶
山東官兵。赴湖北軍營聽候調遣。行抵
河南。留勦彰德等府屬聯莊會匪。七月。
隨河南河北鎮總兵崇安。進勦新鄉。獲
嘉等縣匪眾。均力戰解圍。並將彰德懷
慶府屬會匪。以次殲除。一律肅清。六年
五月。河南巡撫英桂。以鳳祥疊次接仗。

戰功最著。奏請以參將儘先補用。

允之。並

賞換花翎。尋補臺莊營參將。時安徽亳州捻匪分股出皖。豫各境。其一股由歸德竄入柘城縣境內。窺伺陳州。鳳祥以英桂檄馳赴陳州扼要防剿。旋越境抵亳州城下。攻破匪巢。城圍立解。並將白龍王廟

等處賊巢勦洗。八月。復帶步隊截擊敗竄匪眾。殲戮多名。七年四月。升陝西西安城守協副將。七月。英桂以鳳祥屢次勦捻出力。疏請獎勵。

賞加總兵銜。時皖捻方踞六安州城。經官軍圍攻。疊次出撲。均擊敗之。我軍分紮鳳凰橋等處。八年四月。匪眾擁大股分撲我

軍營壘。鳳祥偕各軍分督兵勇。然礮轟擊賊大潰。乘勢追奔。殲四五百名。越日。我軍乘夜薄城。會內應啟門。兵勇擁進。賊紛紛奔竄。我軍復沿途撻殺數千名。遂將州城克復。七月。皖捻被勦勢蹙。由鳳陽懷遠向靈璧睢甯一帶竄突。經我軍擊敗。擒首張落刑糾眾。襲踞陳家莊。

等民墟。抗拒官軍。鳳祥督兵會合民團。馳往攻勦。節次斬馘多匪。並俘擒日余慶遠等。暨夥眾數十人。克陳家莊等四墟。十月。懷遠擒首李大喜等。於澮河迤南屢圖北犯。經官軍勦敗。復由宿州符離集折西奔竄。鳳祥偕知縣張汝梅督飭兵勇。豫伏褚莊。匪眾甫過符離集。伏

兵突起堵截。賊驚潰。追奔二十餘里。賊復在澮河北岸牛牌地方築墟抗拒。鳳祥偕知府張學醇等分督馬步各隊進攻。奪門而入。賊紛竄。我軍併力追截。斬馘殆盡。十一月。經

欽差大臣都統勝保督辦三省勦匪事宜。太僕寺卿袁甲三彙案奏獎。得

旨以總兵記名簡放。九年二月。懷遠逆賊被勦。竄渡澮北。經我軍截擊。遁回澮河。鳳祥復偕遊擊滕家勝督兵施放擡礮。將渡河對岸。並駛至中流。各匪擊斃無算。九月。隨督辦河南軍務黑龍江副都統關保勦擒逆巨股於亳東丁垵集等處。鳳祥偕總兵朱連泰等督軍分路逼攻。殲

匪甚夥。經河南巡撫瑛榮。偕關保會疏
上其功。

賞資勇巴圖魯名號。十月。捻股之竄豫境者。欲
由舞陽及郟城兩路。會合肆擾。關保移
師許州。鳳祥帶兵馳抵洪河。遇賊迎擊。
殲數十人。賊旋擁至臨潁。攻撲縣城。我
軍追擊。連次大敗之。其別股竄鄆陵等

處。官軍馳勦。敗之於太康縣之王隆集。
餘眾竄逸。鳳祥督帶馬隊。緊躡賊蹤。痛
勦。沿途搜殺甚多。賊奪路東竄。復於周
家口被勦。狂奔。乘虛撲擾鹿邑。鳳祥等
帶兵扼截。遇於梁老家等處。馬步合擊。
痛殲之。援賊踵至。官軍分兩翼掩殺。馬
隊直擣中堅。賊大潰。先後擒斬三百餘

名。越日。逆悉眾來撲。我軍分隊禦之。陣
斬千餘人。大獲全勝。經關保先後疏陳
請獎。得

旨。下部優敘。十年正月。擢四川川北鎮總兵。時
鳳祥隨關保駐營鹿邑。督勦竄捻。三月。
賊分股擾西平上蔡等縣。均經官軍勦
敗。奔竄閏三月。賊復於蔡浦地方游駛。

關保督軍窮追。俘馘首夥。匪眾多名。適
鳳祥督兵至。逆眾忽逢勁旅。驚潰東竄。
我軍追抵槐午店等處。殲戮千餘。奪獲
軍械無算。隨馳勦確山縣等處竄匪。行
抵魏橋地方。鳳祥指揮各軍。截斷賊隊。
匪勢不支。我軍乘勝追殺十餘里。殪賊
千五百有奇。賊蹤已入亳州境。逼近老

巢鳳祥銳意深入。矛刺賊目多名。適賊
騎分路擁撲。鳳祥馬蹶失跌。遂為羣賊
攢刺歿於陣。事

聞。

諭曰。四川川北鎮總兵王鳳祥。久經行陣。疊著
戰功。茲以追賊陣亡。殊堪憫惜。著照提督陣
亡例議卹。尋

賜祭葬。

予謚恭勤。

賞騎都尉世職。子朝霖襲。

蔣興朝傳

蔣興朝。安徽亳州監生。咸豐五年。擒匪肆擾。穎亳戒嚴。興朝奉檄集團。教練族眾。節次協助官軍防勦。十年六月。在州屬八里塚地方禦捻陣亡。事

聞。

賞卹如例。

葉正傳

葉正。河南光州直隸州人。由行伍隸南陽鎮標。歷拔光州汛城守把總。咸豐十年。隨勦安徽粵捻各逆。屢立戰功。保獎。賞戴藍翎守備銜。七月。賊陷桐城。正隨同官兵攻擊西門賊卡。受傷死之事。

聞。

賞卹如例。

恩給雲騎尉世職。

承惠傳

承惠。孫氏。漢軍正白旗人。由繙譯生員補領催。咸豐三年。升鑾儀衛整儀尉。五年。得

旨發往河南以守備用。六年。皖捻滋事。竄擾豫境。承惠隨河南巡撫英桂。赴歸德防勦出力。

賞戴藍翎。並免補本班。以都司即補。七年三月。補直隸玉田營都司。並以協勦鹿邑。亳州擒匪出力。

賞換花翎。以遊擊留豫儘先補用。九月。補河南開封城守營遊擊。率兵解確山縣城圍。追賊至角子山。殲匪殆盡。八年二月。得旨以參將歸本省儘先補用。尋督帶陝甘甯夏

官兵。勦皖省阜陽西蘆莊教匪。首先越濠。平毀賊巢。

賞副將銜。八月。補汝甯營參將。十月。英桂以承惠帶兵駐亳。衝鋒陷陣。勇冠諸軍。奏聞。

賞加哈塔巴圖魯名號。

賜銀百兩。九年正月。護理南陽鎮總兵。時亳逆

意圖西竄。經承惠督兵勦擊。疊次獲勝。匪眾由大寺集。至石家營。竄兩河口。民寨。承惠跟追掩殺。立將賊寨平毀。經河南巡撫瑛榮保奏。

命以副將升用。十二月。以疊次勦擒出力。得旨免補副將。以總兵升用。尋授廣東高連鎮總兵。十年正月。瑛榮以承惠帶隊得力。奏

請留營。並調補河南河北鎮總兵。

允之。七月。毫擒劉狗等糾眾竄鹿邑。占踞萬集等處民寨。圖撲城池。經承惠等分路兜勦。克復萬集趙村等寨。逆匪復糾眾撲城。承惠會同副都統關保等夾擊。斃賊無算。豫境肅清。河南巡撫慶廉以

聞。

賞提督銜。尋勦匪於高辛集。臨陣退縮。經慶廉
奏劾。褫提督銜。八月。皖捻復出巢肆擾。
承惠迎勦於野豬岡。鏖戰四時。斃匪千
餘。賊稍卻。復有大股馬賊。由大石橋後
路突入。將官兵衝斷。步賊乘勢回撲。合
隊圍裹。承惠身被數槍。猶裹創力戰。殪
賊目數名。力竭死之事。

聞。

諭曰。河南河北鎮總兵承惠。忠勇過人。士卒受
戴。力竭捐軀。殊堪憫惜。著賞還提督銜。照提
督例從優議卹。尋

賞卹如例。

予謚忠武。

恩給騎都尉。加一雲騎尉世職。子錫光襲。

喀爾庫傳

喀爾庫。吳扎拉氏。滿洲正白旗人。駐防
吉林。咸豐三年。由前鋒出師河南。四年。
補驍騎校。五年。升防禦。六年。隨湖廣總
督官文。攻勦湖北黃州竄匪。旋偕護軍
參領舒保等。將李家集等處踞匪攻潰。
追殺三十餘里。殲斃甚夥。又會同黃陂

縣練勇。馳抵柳子巷。喀爾庫首先渡河。徑撲賊營。乘風縱火。燒賊火器火藥。賊驚潰。我軍截勦。生擒八十餘名。餘匪竄伏麥田。按殺無遺。旋進勦新洲竄匪。偕佐領密雅明阿等。乘夜急追數十里。斃賊三百餘人。燒燬賊船數十隻。復追至團風地方。直逼賊巢。施放火箭洋礮。燬

其囤糧屋舍。將團風新洲一帶賊壘。次第削平。次日。又遇賊船五十餘隻。將圖上竄。喀爾庫督把總陳占整等。駛至陽邏設伏。賊至。火器突發。燒燬賊船十餘隻。官文上其功。

賞戴花翎。七年二月。擢佐領。三月。隨官文勦賊。連克黃州。武昌。大冶。興國等郡縣。又攻

破小池口賊壘。暨宿太大股援賊。捷

聞。

賞給齊車格勒巴圖魯名號。九年八月。勦平安

慶賊壘。以協領儘先補用。十一月。隨副

都統多隆阿等。攻克安徽石牌鎮。踞逆。

賞加副都統銜。十年正月。髮逆陳玉成等。糾眾

擒首。在潛山縣屬之地。靈港東西兩岸。

分路上竄。喀爾庫將東岸賊壘全行踏

毀。復毀西岸賊壘數座。十二月。賊復糾

合擒匪撲楚軍營壘。喀爾庫督隊截勦。

力戰陣亡。官文等以

聞。

命照副都統例從優議卹。尋

賞卹如例。

贈都統銜。

恩給騎都尉。兼一雲騎尉世職。子魁林襲。

吳明亮傳

吳明亮。湖南益陽縣人。由軍功於咸豐六年。從大軍攻克武昌。擢外委。並

賞戴藍翎。嗣以功遷守備。八年三月。官軍在湖口彭澤等處。殺賊逾萬。賊分股上竄蘄州。復經擊退。明亮從戰有功。湖廣總督官文奏請獎勵。得

旨加都司銜。

賞換花翎。八月。皖匪陷麻城。黃安。明亮從大軍進攻。一日連克二城。復越境追剿。殲賊無算。以都司用。並加遊擊銜。九月。從攻太湖。太湖界皖鄂之衝。溪山險阻。賊據為要害。我軍進圍。賊由東壘出拒。敗之。諸營進薄城南。毀楓香鋪。小池驛賊壘。

以火箭射城中。賊駭亂。我軍奮呼登城。克之。副都統都興阿上其功。

命以參將即補。十年。賊酋陳玉成糾捻匪竄潛山。明亮從都興阿進剿。攻賊於地靈港。力戰死之事。

聞得。

旨照副將例議卹。尋

賞卹如例。

予謚剛愨。

恩給雲騎尉世職。

楊清擢傳

楊清擢。山東泰安縣人。由行伍拔補額
外外委。咸豐九年。奉派出師河南。在陳
許一帶地方勦捻出力。拔補充右營把
總。十一年。調赴安徽征勦。四月。在鳳陽
府城西。與捻接仗陣亡。事

聞。

賞卹如例。

恩給雲騎尉世職。子登雲襲。

大清國
鑄印

